




## Arnaq ineriartorusuttoq



*Cecilie L. Abelsen Ikamiuni niuertoraarput.*

Cecilie L. Abelsen, ulluinnarni Nuunumaaq, Ikamiuni Pilersuisumi niuertuuvoq, ukiorpaalunngorpaalu niuertuulluni.

- 1997-imi niuertutut misilitsippunga, taamaattorli 1986-imili Pilersuisumi allaffimmiutut aallartippunga, Cecilie qiimarpalulluni aallartippoq. Nangippoq:

- Niuertutut sulilerninni pissanganartorpassuit aqusaarnikuuakka. Niuertunngoqqaarama 1998-imi niuertut Nuummi ataatsimeersuarnerannut peqataavunga. Tassani pisiniarfiit saqqummiunneqarmata Ikamiut aningaasanik isertitakitsutut taaneqarpoq. Eqqaamavara tamanna paasigakkuli taamaattoqassanngitsoq aalajangiunnikuullugu. Taamanili sukataalerpunga, Cecilie illarasaarpoq.

Ilumoorsaarporli. Ceciliemi arnaavoq ineriartorusuttoq unammillerusussuseqartorlu, inuttut sulinerminilu.

Cecilie aalajangiussigamili Ikamiuni Pilersuisoq siumut aallarpoq.

- Ilimanaq, Kitsissuarsuit Akunnaarlu taamani nipaatumik nammineq pigalugu unammilerpakka. Pingaartittuarpara nioqqutissaqarluartuarnissaq, avataaniillu tikittoqaraangat niuerniarfigillaqqittarpakka pilersisarluarlugit, taamaammat manna inukilliartuleraluallarmat pisiniarfippit ajunngitsumik ingerlaannarpoq, Cecilie oqaluttuarpoq, imminullu upperinissaq pingaartuusoq Ceciliep aamma eqqaavaa, pingaartumik nunaqarfimmi niuertuussagaanni, Ikamiunimi ukiut tullerit marluk upernaakkut saarulleeruttarnera ammeriviullu matoqqasaqattaartarnera malunnaataasarput.



Ikamiut inuerukkiartulersimanera uterfigeqqikkutsigu.

Ikamiut maanna 100-t missaanni inoqarpoq, nunaqarfilli ukiualunnguit matuma siorna inuerukkiartupallassimagaluarpog, 60-it 70-illu akornanni inoqalerluni. Maannali qujanartumik februaari naajartulernerani qalerallit aalisarluarneqartalerput, ammerivik aallartilluaqqippoq Ikamiuniillu nuunikut utertaleqqinnikuupput.

### **Kajumissaaserneqarneq**

Cecilie ukioq kingulleq 55-iliivoq, Ikamiormiuvoq, ueqarpoq ataatsimillu erneqarluni. Suliffimmi malittarisassat piumasaqaataalu pingaartittuuai, sulisunullu nutaanut aamma oqaatiguarlugit.

- Massakkut maani suleqatigiilluarterujussuuvugut, pisiniarfiullu ingerlalluarnernanut tamanna sunneeqataalluarterpoq, Cecilie oqarpoq. Ikamiuni Pilersuisoq, Cecilie ilanngullugu, pingasunik sulisoqarpoq. Ataatsimik ikiorteqarput piffissami aalajangersimasumi sulisartog.

Cecilie sulinermini unammillernartut aamma aqqusaartarpai. Ineriartorusukkaannili tamakku avaqqunneqarsinnaanngillat. Soorlu 2010-mi Cecilieq nunaqarfiit sisamat ataatsikkut niuertuuffigalugit aamma misilinnikuaa.

Cecilieq sulinermini ineriartortitserusseqartuunera angusaqarusuttuuneralu takussutissartaqarpoq. 2001-imi Ikamiut Pilersuisoq kajumissaaserneqarpoq, taamatullu 2004-mi. Ikamiut 2005-imi nunaqarfitalattut aamma toqqagaavoq. Taakku saniatigut Cecilie Upernavik tikillugu niuertoqarfinni allani oqalugiartarpoq, ingerlalluarniaraanni siunnersuutit ilaatigut oqalugiaatigisarlugit.



*Ikamiuni Pilersuisup allaffiani kajumissaatit nivingapput.*



### **Niuertunngorniarneq**

Ukiut marlungulerput Ceciliep niuertunngorniarluni ilinniakkani naammassigamiuk, inuttaatalu pisarsiaqaatigingaaatsiarsimavaa.

- Oqartarpunga aatsaat massakut niuertutut ilinnialeruttorlunga. Aqutsinnaaneq ilinniarluarpara. Suleqatikka aperinikuuakka uanni suut amigaatigineraat, akinikuupput naapinnerusinnaasugut. Maanna ullaat tamaasa ataatsimeeqqaartarpugut. Ippassaq ulloq qanoq innersoq, isertitagut, saqqummiinerit, suliasat tamakku tamaasa eqqartoqqaartarpagut. Niuertunngorniarninni ilikkakkakka atorluaqaakka, Cecilie oqaluttuarpoq.

Ceciliep pingaartitaasa ilagaat ataatsimiinnermi sulisut arlaat uummammioqarunik, inuttut ajornartorsiorunik ammasumik eqqartortassagaat.

- Kaammattortuarpakka inuttut suliasat suliarinissaat pingaartorujussuusoq, oqarpoq.

Taakku saniatigut Ceciliep aamma pingaartippaa pisiniarfiup ullormut nutaamut piareeqqanissaa, suleqatiminullu kaammattuerpalaartumik nipilimmik ima oqartuarluni, 'ullumikkut tunisaqarluarnissarput upperissavarput sullitagullu ajunngitsumik pissavagut.'

### **Imminut paarinissaq**

2000-imi stressimik eqqugaanermi kingorna Cecilie imminut paarinerulerluni timersortalernikuuvoq, zumbartalersimavoq pisuttuarterlunilu.

- Pinngortitamut qanittuararsuuvunga. Sulingiffinni umiatsiamik angalaarneq illuaraliarnerlu ilaqtakka peqatigalugit aalluttorujussuusarpagut, Cecilie oqarpoq. Imminullu paarinerulerneq allatigut aamma kinguneqarluarpoq.

- Killiliisinnaaneq ajorneq ajortoq ilikkarnikuuara. Iluaqutigisaqaara, naggasiivoq.